



KEMENTERIAN PERPADUAN NEGARA

SIARAN MEDIA

MALAYSIA - TURKIYE TANDATANGANI MEMORANDUM PERSEFAHAMAN DALAM BIDANG KEARKIBAN

ISTANBUL, 27 Ogos 2025 – Satu langkah bersejarah dalam memperkuat hubungan dua hala antara Malaysia dan Turkiye telah dilakar menerusi **Memorandum Persefahaman (MoU)** antara **Kerajaan Malaysia** dan **The Directorate of State Archives of the Presidency of the Republic of Turkiye**.

YB Datuk Aaron Ago Dagang, Menteri Perpaduan Negara telah menandatangani MoU tersebut bagi pihak Malaysia, manakala pihak Turkiye diwakili oleh Professor Madya Muhammet Ahmet Tokdemir, Pengarah, The Directorate of State Archives of the Presidency of the Republic of Turkiye.

MoU ini bertujuan untuk menggalakkan kerjasama erat antara kedua-dua institusi kearkiban negara dalam bidang penyelidikan, pemeliharaan, dan pendigitalan dokumen sejarah, selaras dengan undang-undang dan dasar sedia ada di kedua-dua negara. Kerjasama dua hala ini mencerminkan komitmen bersama dalam memelihara dan memperkaya khazanah warisan sejarah yang menjadi bukti penting kepada tamadun, peradaban dan hubungan diplomatik masa silam.

Pemeliharaan dokumen-dokumen arkib bukan sahaja melibatkan aspek teknikal dan digitalisasi, malah turut mencerminkan penghargaan kita terhadap identiti, nilai dan akar budaya yang membentuk negara bangsa. Malaysia percaya bahawa akses kepada maklumat sejarah yang sahih akan memperkuat jati diri rakyat serta memupuk pemahaman merentas budaya dan sempadan.

Antara intipati utama MoU ini termasuk:

- I. Menggalakkan **kerjasama antara institusi kearkiban** masing-masing berdasarkan pematuhan terhadap peraturan serta dasar negara masing-masing.
- II. Menjalankan **penyelidikan bersama dan pertukaran salinan semula dokumen arkib, buku, panduan, inventori dan bahan penyelidikan** yang diterbitkan.
- III. **Pertukaran kepakaran dalam bidang teknologi moden, pendigitalan, dan aktiviti restorasi arkib**
- IV. **Penganjuran bersama mesyuarat ilmiah dan pameran dalam bidang kearkiban** serta sumbangan bahan pameran berbentuk salinan dokumen arkib.

Delegasi Malaysia juga berkesempatan melawat fasiliti penyimpanan dan makmal arkib Turkiye yang menempatkan **dokumen-dokumen bersejarah dari era Empayar Uthmaniyah yang merangkumi lebih 700 kilometer rak penyimpanan, dengan 70% daripadanya telah didigitalkan** yang mampu menjadi penanda aras dan rujukan bagi pelaksanaan inisiatif pendigitalan Arkib Negara Malaysia.

Kementerian Perpaduan Negara percaya bahawa kerjasama ini akan menjadi asas kukuh dalam memperkaya koleksi arkib negara, memperluaskan jaringan kepakaran serta mendukung usaha pemeliharaan warisan sejarah serantau dan global.

Kementerian Perpaduan Negara

27 Ogos 2025

KPN.100-9/1/16 (66)